

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савјет

R J E Š E N J E
o nepostojanju zloupotrebe dominantnog položaja
privrednog subjekta Telekomunikacije Republike Srpske a.d. Banja Luka,
postupanje po Presudi Suda BiH broj: S1 3 U 044672 23 U od 25.07.2024. godine

Sarajevo
januar, 2025. godine



Broj: 05-26-2-028-259-II/10
Sarajevo, 30. januar 2025. godine

Konkurencijsko vijeće Bosne i Hercegovine na osnovu člana 25. stav (1) alineja e), člana 11. stav (3), a u skladu s članom 11. stav (2) Zakona o konkurenciji («Službeni glasnik BiH», br. 48/05, 76/07 i 80/09) i člana 105. Zakona o upravnom postupku («Službeni glasnik BiH», br. 29/02, 12/04, 88/07, 93/09, 41/13 i 53/16), rješavajući po posebnom Zahtjevu za donošenje rješenja, podnesak broj: 05-26-2-028-257-II/10 od 13.01.2025. godine, od strane privrednog subjekta Crumb group d.o.o. u stečaju Brčko distrikt ul. Bulevar mira br. 5, Brčko distrikt, Bosna i Hercegovina, zastupanog po advokatu Avlijaš S. Ognjenu ul. Gavrila Principa br. 18/1, Bijeljina, u postupku izvršenja Presude Suda Bosne i Hercegovine broj: S1 3 U 044672 23 U od 25.07.2024. godine na 21. (dvadesetprvoj) sjednici održanoj dana 30.01.2025. godine, donijelo je

R J E Š E N J E

1. Smatra se da privredni subjekt Telekomunikacije Republike Srpske a.d. Banja Luka ul. Kralja Petra I Karađorđevića br. 93, Banja Luka, Bosna i Hercegovina u skladu sa članom 11. stav (2) Zakona o konkurenciji, ne zloupotrebljava dominantan položaj u smislu člana 10. stav (2) tačke b), c) i d) istog zakona.
2. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće Bosne i Hercegovine je dana 30.11.2010. godine pod brojem: 05-26-028-II/10 zaprimilo Zahtjev za pokretanje postupka (u daljem tekstu: Zahtjev), u smislu člana 28. Zakona o konkurenciji (u daljem tekstu: Zakon), podnesen od strane privrednog subjekta Crumb group d.o.o. Bijeljina, ul. Kneza Ive od Semberije 4, Bijeljina (u daljem tekstu: Podnosilac zahtjeva ili Crumb group), zastupanog putem advokata Ognjena S. Avlijaša ul. Trg Kralja Petra I, Bijeljina, protiv privrednog subjekta Telekomunikacije Republike Srpske a.d. Banja Luka ul. Kralja Petra I Karađorđevića br. 93, Banja Luka (u daljem tekstu: Telekomunikacije RS), kojeg zastupa advokat Stevan Dimitrijević ul. Gundulićeva 4, Banja Luka, radi sumnje o postojanju zabranjenog sporazuma u smislu člana 4. stav (1) tačka d) i zloupotrebe dominantnog položaja u smislu člana 10. stav (2) tačke a), b), c) i d) Zakona.

Nakon kompletiranja Zahtjeva, Konkurencijsko vijeće Bosne i Hercegovine (u daljem tekstu; Konkurencijsko vijeće) je izdalo Potvrde o prijemu kompletnog i urednog Zahtjeva, u skladu sa članom 28. stav (3) Zakona, broj: 05-26-2-028-8-II/10 od 02.03. 2011. godine

Na osnovu dostavljenih informacija i dokumentacije ocjenjeno je da nije moguće bez provođenja postupka utvrditi postojanje povrede Zakona na koje Podnosilac zahtjeva ukazuje, te je donijelo Zaključak o pokretanju postupka broj: 05-26-2-028-9-II/10 od 02.03.2011. godine.

Kako se radi o postupku sa strankama sa suprotnim interesima, u svrhu prikupljanja novih dokaza i pružanja mogućnosti strankama da se izjasne o činjenicama i okolnostima koje su od važnosti za donošenje konačnog rješenja, Konkurencijsko vijeće je u skladu sa članom 39. Zakona, održalo usmenu raspravu dana 25.05.2011. godine, te pružilo mogućnost strankama u postupku da iznesu dokaze i postavljaju pitanja protivnoj strani.

Podnosilac zahtjeva se u toku usmene rasprave izjasnio da odustaje od dijela Zahtjeva koji se odnosi „na sumnju o zloupotrebi dominantnog položaja iz člana 10. stav 2. tačka a) Zakona vezano za cijenu usluge terminacije međunarodnih poziva“, pa je Konkurencijsko vijeće imajući u vidu izloženo u skladu sa članom 122. stav 2. Zakona o upravnom postupku, dana 08.06.2011. godine pod brojem: 05-26-2-028-39-II/10, donijelo Zaključak o obustavi postupka u dijelu koji se odnosi na sumnju o zloupotrebi dominantnog položaja iz člana 10. stav 2. tačka a) Zakona.

Imajući u vidu složenost predmeta, kao i da je za utvrđivanje činjeničnog stanja i ocjenu dokaza bilo potrebno izvršiti dodatne analize, te da se radi o osjetljivim tržištima, Konkurencijsko vijeće je ocijenilo da je rok za donošenje konačnog rješenja iz člana 41. stav (1) tačka c) Zakona, potrebno produžiti za dodatna tri mjeseca u smislu člana 41. stav (2) Zakona te je dana 08.06.2011. godine aktom broj: 05-26-2-028-40-II/10 donijelo Zaključak o produženju roka za donošenje rješenja za dodatna 3 (tri) mjeseca.

1. Postupanje nakon provedenog postupka – (ne)donošenje konačnog rješenja u zakonskom roku tužbeni postupci pred Sudom BiH i presude Suda BiH u periodu 2011. – 2023. godine

Konkurencijsko vijeće je na 17. sjednici održanoj dana 29.09.2011. godine razmatralo Nacrt konačnog rješenja po Zahtjevu Podnosioca zahtjeva. Međutim, kako se nisu ispunili zakonski uslovi u smislu člana 24. stav (2) Zakona Konkurencijsko vijeće nije moglo donijeti rješenje u zakonom propisanom roku, te je na zahtjev privrednog subjekta Telekomunikacije RS donijelo Rješenje broj: 05-26-2-028-76-II/10 dana 12.10.2011. godine, u smislu člana 11. stav (3) Zakona, prema kojem se smatra da zaključenim sporazumom, odnosno postupanjem privredni subjekt Telekomunikacije RS nije zloupotrijebio dominantni položaj.

Protiv navedenog Rješenja Konkurencijskog vijeća privredni subjekt Crumb group je podnio tužbu Sudu Bosne i Hercegovine (u daljem tekstu: Sud BiH). Sud BiH je, rješavajući po tužbi privrednog subjekta Crumb group, donio presudu broj: S1 3 U 007875 11 U dana 10.10.2013. godine kojom je uvažio tužbu i navedeno Rješenje Konkurencijskog vijeća poništio i vratio na ponovno odlučivanje.

Postupajući po presudi Suda BiH, a nakon provedenog postupka po zahtjevu privrednog subjekta Crumb group protiv privrednog subjekta Telekomunikacije RS radi sumnje o postojanju zloupotrebe dominantnog položaja u smislu člana 10. stav (2) tačke a), b), c) i d) Zakona, Konkurencijsko vijeće je na 87. sjednici, održanoj dana 17.04.2014. godine, ponovno razmatralo Prijedlog konačne odluke.

Prilikom razmatranja i glasanja po prijedlogu rješenja nisu ispunjeni zakonski uslovi predviđeni članom 24. stav 2. Zakona, koji propisuje da se odluke Konkurencijskog vijeća donose većinom glasova prisutnih članova s tim da za svaku odluku mora glasati najmanje po jedan član iz reda konstitutivnih naroda. Naime, četiri člana Konkurencijskog vijeća su glasali za prijedlog rješenja, dok su dva člana bila protiv. Iz navedenog proizlazi da Konkurencijsko vijeće nije moglo donijeti konačnu odluku.

Članom 11. stav (2) Zakona propisano je, da ukoliko Konkurencijsko vijeće ne donese rješenje u roku iz člana 41. stav (1) tačka c), smatra se da se zaključenim sporazumom odnosno postupanjem privrednog subjekta ne zloupotrebljava dominantan položaj. Na poseban zahtjev privrednog subjekta, Konkurencijsko vijeće u skladu sa članom 11. stav (3) Zakona donosi rješenje da zaključenim sporazumom, odnosno postupanjem privredni subjekt ne zloupotrebljava dominantan položaj.

Konkurencijsko vijeće je aktom broj: 05-26-2-028-141-II/10 od 21.04.2014. godine obavijestilo stranke u postupku, da konačno rješenje u postupku nije doneseno iz razloga što se nisu mogli ispuniti zakonom propisani uslovi za njegovo donošenje, te su poučene o pravu iz člana 11. stav (3) Zakona.

Privredni subjekt Crumb group podnio je Konkurencijskom vijeću poseban Zahtjev za donošenje rješenja u smislu člana 11. stav (3) Zakona dana 05.05.2014. godine pod brojem: 05-26-2-028-142-II/10.

Postupajući po Zahtjevu za donošenje rješenja Podnosioca zahtjeva, a imajući u vidu naprijed navedeno, Konkurencijsko vijeće je na 91. (devedesetprvoj) sjednici održanoj dana 29.05.2014. godine, donijelo Rješenje broj: 05-26-2-028-144-II/10 kojim se smatra da privredni subjekt Telekomunikacije RS, u skladu sa članom 11. stav (2) Zakona, ne zloupotrebljava dominantan položaj u smislu člana 10. stav (2) tačke b), c) i d) istog Zakona.

Protiv navedenog Rješenja Konkurencijskog vijeća, privredni subjekt Crumb group je podnio tužbu Sudu BiH. Sud BiH je rješavajući po tužbi privrednog subjekta Crumb group, donio Presudu broj: S1 3 U 016696 14 U dana 21.04.2016. godine kojom je uvažio tužbu, osporeno Rješenje poništio i predmet vratio Konkurencijskom vijeću na ponovno rješavanje.

U presudi se, u bitnom, navodi da je zaključak Konkurencijskog vijeća suprotan odredbi člana 1. Zakona obzirom da je osnovni cilj i svrha Zakona da Konkurencijsko vijeće u okviru svoje nadležnosti donosi mjere u cilju zaštite i promocije tržišne konkurencije u Bosni i Hercegovini te da nije sporno da je Konkurencijsko vijeće ovaj predmet okončao procesnom odlukom u smislu člana 41. stav (1) tačka c) Zakona na način da je u skladu sa članom 11. stav (3) istog Zakona donio Rješenje kojim se smatra da privredni subjekt Telekomunikacije RS ne zloupotrebljava dominantan položaj na tržištu, u smislu člana 10. stav (2) Zakona.

Po ocjeni Suda BiH za neefikasnost u rješavanju zahtjeva stranaka se ne mogu naći objektivna opravdanja što implicira da je postupanje Konkurencijskog vijeća, formalno pokriveno zakonskim odredbama, u svojoj suštini suprotno smislu i ciljevima Zakona. Presudom je naloženo da Konkurencijsko vijeće, vodeći računa o primjedbama iznesenim u predmetnoj Presudi, pravilno i potpuno utvrdi činjenično stanje u rokovima propisanim zakonom i meritorno odluči o zahtjevu tužitelja. U protivnom sud može koristiti ovlaštenja koja su mu data članom 83. Zakona o upravnim sporovima.

S ciljem izvršenja predmetne Presude Suda BiH, Konkurencijsko vijeće je nastavilo sa postupkom. S obzirom na značajan protek vremena, dana 20.05.2016. godine Konkurencijsko vijeće obratilo se privrednom subjektu Crumb group upitom broj: 05-26-2-028-159-II/10 da li ostaju kod predmetnog Zahtjeva, te u slučaju da osjete potrebnim, dostave očitovanje po Presudi Suda, te Protivnoj strani uputilo zahtjev broj: 05-26-2-028-160-II/10 dostavljanje eventualnog očitovanja na navode iz predmetne Presude.

Privredni subjekt Crumb group je dana 26.05.2016. godine podneskom broj: 05-26-2-028-161-II/10 dostavio očitovanje da ostaje kod daljeg vođenja postupka, dok je očitovanje na traženo privredni subjekt Telekomunikacije RS dostavio dana 25.05.2016. godine podneskom broj: 05-26-2-028-162-II/10, ističući da je stav Suda BiH u Presudi bez pravnog utemeljenja.

S ciljem izvršenja predmetne presude i postupanja po nalogu Suda BiH, Konkurencijsko vijeće je Prijedlog konačnog rješenja razmatralo na 131. (stotintridesetprvoj) sjednici Konkurencijskog vijeća, održanoj dana 14.07.2016. godine.

Prilikom razmatranja i glasanja po Prijedlogu rješenja nisu ispunjeni zakonski uslovi predviđeni članom 24. stav (2) Zakona, te isto nije usvojeno, o čemu su učesnici u postupku obavješteni dana 14.07.2016. godine aktom broj: 05-26-2-028-163-II/10.

Privredni subjekt Crumb group podnio je Konkurencijskom vijeću poseban Zahtjev za donošenje rješenja u smislu člana 11. stav (3) Zakona dana 21.07.2016. godine pod brojem: 05-26-2-028-164-II/10.

Rješenje o nepostojanju zloupotrebe dominantnog položaja privrednog subjekta Telekomunikacije RS, u skladu sa članom 11. stav (2) Zakona o konkurenciji, broj: 05-26-2-028-171-II/10 doneseno je na 135. sjednici održanoj dana 10.11.2016. godine.

Protiv Rješenja Konkurencijskog vijeća broj: 05-26-2-028-171-II/10 privredni subjekt Crumb group je podnio tužbu Sudu BiH.

Sud BiH je rješavajući po tužbi privrednog subjekta Crumb group, donio presudu broj: S1 3 U 023933 17 U dana 11.09.2018.godine kojom je uvažio tužbu, osporeno rješenje poništio i predmet vratio na ponovno rješavanje (podnesak broj: 05-26-2-028-180-II/10 od 12.09.2018. godine).

Konkurencijsko vijeće je dana 25.09.2018. godine aktom broj: 05-26-2-028-184-II/10 pozvao privredni subjekt Telekomunikacije RS na eventualno očitovanje po pitanju navoda iz Presude Suda BiH. Podneskom koje je zaprimljen dana 01.10.2018. godine pod brojem: 05-26-2-028-185-II/10 privredni subjekt Telekomunikacije RS je zatražio prolongiranje roka što je Konkurencijsko vijeće aktom broj: 05-26-2-028-186-II/10 dana 02.10.2018. godine ocijenilo opravdanim te odobrilo.

Privredni subjekt Crumb group je dana 24.09.2018. godine podneskom broj: 05-26-2-028-183-II/10 dostavio očitovanje da ostaje kod daljeg vođenja postupka dok je očitovanje na traženo privredni subjekt Telekomunikacije RS dostavio dana 22.10.2018. godine podneskom broj: 05-26-2-028-188-II/10 ističući, u bitnom, da smatra da je Presuda Suda BiH nije na zakonu zasnovana.

Konkurencijsko vijeće je aktom broj: 05-26-2-028-192-II/10 dana 16.11.2018. godine zatražilo od privrednog subjekta Crumb group, imajući u vidu sva dalja postupanja po pometnutoj Presudi da, obzirom na protok vremena od dana podnošenja Zahtjeva do danas, dostave informacije kojima Konkurencijsko vijeće već ne raspolaže, a koje se isključivo odnose na navode iz Zahtjeva i period povrede na koji se ukazuje.

Postupajući po nalogu Suda BiH Konkurencijsko vijeće je Prijedlog konačnog rješenja razmatralo na 45. (četrdesetpetoj) sjednici Konkurencijskog vijeća održanoj dana 31.01.2019. godine.

Prilikom razmatranja i glasanja po Prijedlogu rješenja nisu ispunjeni zakonski uslovi predviđeni članom 24. stav (2) Zakona te isto nije usvojeno, o čemu su učesnici u postupku obavješteni dana 04.02.2019. godine aktom broj: 05-26-2-028-194-II/10, a Sud BiH aktom broj: 05-26-2-028-195-II/10.

Privredni subjekt Crumb group podnio je Konkurencijskom vijeću poseban Zahtjev za donošenje rješenja u smislu člana 11. stav (3) Zakona dana 15.02.2019. godine pod brojem: 05-26-2-028-196-II/10. U predmetnom podnesku zatraženo je da obrazloženje rješenja sadrži objašnjenje razloga izostanka primjene dosadašnjih presuda Suda BiH, kao i da sadrži pojašnjenje koji vitalni nacionalni interes bi bio povrijeđen donošenjem meritornog rješenja pa je izostao glas člana nekog od konstitutivnih naroda.

Obzirom da postupanje Konkurencijskog vijeća suprotno sudskim odlukama podliježe krivičnoj odgovornosti zatraženo je, uz dostavu rješenja, izjašnjenje da li će Vijeće obavijestiti nadležne institucije o

nepostupanju u skladu sa sudskim odlukama radi pokretanja krivičnog postupka. Ukoliko Konkurencijsko vijeće ne poduzme korake u tom pravcu, privredni subjekt Crumb group je naveo poduzeti iste.

Postupajući po navedenom Konkurencijsko vijeće je na 49. (četrdesetdevetoj) sjednici, održanoj dana 21.03.2019. godine u skladu sa članom 11. stav (2) Zakona, razmatralo Prijedlog rješenja, te prilikom razmatranja i glasanja po Prijedlogu rješenja kako nisu bili ispunjeni zakonski uslovi predviđeni članom 24. stav (2) Zakona o konkurenciji, isto nije usvojeno.

Po prijemu obavijesti da Prijedlog rješenja nije usvojen na sjednici, Crumb group je dana 08.04.2019. godine podnio poseban zahtjev za donošenje rješenja s ciljem mogućnosti pokretanja upravnog spora pred Sudom BiH, podnesak broj: 05-26-2-028-198-II/10

S obzirom da nije udovoljeno zahtjevu Podnosioca, o čemu je informiran podneskom Konkurencijskog vijeća broj: 05-26-2-028-200-II/10 od 12.09.2019. godine, isti je pokrenuo postupak pred Sudom BiH zbog ćutnje administracije.

Konkurencijsko vijeće je dana 27.04.2022. godine zaprimilo Presudu Suda BiH S1 3 U 035030 20 U od 25.04.2022. godine, kojom je uvažena tužba Crumb group i naložio Konkurencijskom vijeću da donese odluku o zahtjevu tužioca od 31.12.2019. godine, te da tužiocu isplati iznos od 727,50 KM na ime troškova upravnog spora, sve u roku od 30 dana od dana prijema presude.

Konkurencijsko vijeće je ocijenilo potrebnim obratiti se i privrednom subjektu Mtel te istog pozvati na eventualno očitovanje po pitanju predmetne Presude (akt KV broj: 05-26-2-028-207-II/10).

Imajući navode iz Presude, kao i da je istom naloženo, da se donese odluka o zahtjevu za donošenje rješenja Podnosioca zahtjeva od 15.02.2019. godine, Konkurencijsko vijeće je na 106. sjednici u skladu sa članom 11. stav (3) Zakona donijelo Rješenje o nepostojanju zloupotrebe dominantnog položaja broj: 05-26-2-028-213-II/10 od 26.05.2022. godine.

Konkurencijsko vijeće je u prilogu akta broj: 05-26-2-028-233-II/10 dana 29.11.2022. godine privrednom subjektu Crumb group dostavilo Rješenje broj: 05-26-2-028-213-II/10, a zatim o navedenom obavijestilo privredni subjekt Mtel dana 12.12.2022. godine aktom broj: 05-26-2-028-234-II/10 i Sud BiH aktom broj: 05-26-2-028-235-II/10.

Protiv navedenog Rješenja Konkurencijskog vijeća, privredni subjekt Crumb group je podnio tužbu Sudu BiH, te je Konkurencijsko vijeće svoj Odgovor na tužbu Sudu BiH uputilo dana 05.01.2023. godine zajedno sa predmetnim spisom u prilogu akta broj: 05-26-2-028-238-II/10.

Konkurencijsko vijeće je dana 26.07.2024. godine pod brojem: 05-26-2-028-240-II/10 od Suda BiH, zaprimilo Presudu Suda BiH broj: S1 3 U 044672 23 U od 25.07.2024. godine, kojom se uvažava tužba privrednog subjekta Crumb group - u stečaju, poništava Rješenje Konkurencijskog vijeća broj: 05-26-2-028-213-II/10 od 26.05.2022. godine i predmet vraća na ponovno rješavanje.

2 . Postupanje po Presudi Suda Bosne i Hercegovine broj: S1 3 U 044672 23 U od 25.07.2024. godine

Presudom Suda BiH broj S1 3 U 044672 23 U od 25.07.2024. godine uvažena je tužba Crumb Group, Rješenje Konkurencijskog vijeća broj: 05-26-2-028-213-11/10 od 26.05.2022. godine poništeno i predmet vraćen na ponovno rješavanje.

U cilju izvršenja predmetne Presude, kojom je naloženo Konkurencijskom vijeću da tužiocu isplati iznos od 877,50 KM na ime troškova upravnog spora, aktom broj: 05-26-2-028-244-II/10 od 01.08.2024. godine zatraženo je od Podnosioca zahtjeva, da dostavi broj bankovnog računa, sve potrebne podatke za uplatu troškova postupka, novu punomoć za zastupanje Crumb group u predmetnom postupku. Istog dana aktom broj: 05-26-2-028-245-II/10 od privrednog subjekta Mtel je zatražno izjajšnjenje na Presudu, a od Osnovnog suda Brčko distrikta aktom broj: 05-26-2-028-246-II/10 rješenje o imenovanju stečajnog upravnika, obzirom da je Crumb group u stečajnom postupku od 2018. godine.

Kako nije bilo moguće poduzeti aktivnosti u roku koji je predviđen Presudom, Konkurencijsko vijeće je aktom broj: 05-26-2-028-247-II/10 od 12.08.2024. godine obavijestilo Sud BiH da nije moguće postupiti u naloženom roku obzirom na radnje koje je potrebno poduzeti, vodeći računa o iznesenim primjedbama, a uzimajući u obzir specifičnosti predmetog postupka.

Općinski sud Brčko Distrikta na traženje Vijeća dostavio je Rješenje o imenovanju stečajnog upravnika privrednog subjekta Crumb group Osnovni sud Brčko distrikta broj 96 0 St 105684 17 St od 18.05.2023. godine, podnesak zaprimljen dana 14.08.2024. godine pod brojem: 05-26-2-028-248-II/10, a privredni subjekt Mtel je u prilogu podneska broj: 05-26-2-028-249-II/10 dana 15.08.2024. godine dostavio izjajšnjenje na predmetu Presudu.

Crumb group je u prilogu podneska broj: 05-26-2-028-250-II/10 dana 19.08.2024. godine Konkurencijskom vijeću dostavio punomoć za zastupanje Crumb group, traženi broj bankovnog računa, te obavijestio Konkurencijsko vijeće da ostaje pri Zahtjevu na osnovu kojeg je donesen Zaključak o pokretanju postupka, bez obzira na protek vremena.

Po prijemu broja računa za uplatu, Konkurencijsko vijeće je u skladu sa uputom iz dispozitiva Presude, izvršilo uplatu na ime troškova upravnog spora u iznosu od 877,50 KM dana 28.08.2024. godine.

Izjajšnjenje privrednog subjekta Mtel na predmetnu Presudu je dostavljeno Podnosiocu zahtjeva dana 30.10.2024. godine u prilogu akta broj: 05-26-2-028-251-II/10 na eventualno očitovanje, po kojem je Podnosilac zahtjeva i postupio, te svoje očitovanje na predmetno izjajšnjenje Konkurencijskom vijeću dostavio podneskom koji je zaprimljen dana 15.11.2024. godine pod brojem: 05-26-2-028-252 -II/10.

Zahtjev za izjajšnjenjem o troškovima postupka upućen je strankama u postupku aktom broj: 05-26-2-028-253 -II/10 dana 22.11.2024. godine, na koje su obje stranke odgovorile podnesicma broj: 05-26-2-028-254-II/10 (Podnosilac zahtjeva) i broj: 05-26-2-028-255-II/10 (Mtel), zaprimljeni dana 02.12.2024. godine.

Po sticanju uslova, postupajući u skladu sa uputama Suda BiH, ovlašteni član Vijeća skladu sa članom 43. stav. 1. Zakona, nakon završetka postupka dostavio je Konkurencijskom vijeću BiH izvještaj o provedenom postupku s Prijedlogom rješenja, koji je razmatran na 20. sjednici Konkurencijskog vijeća održanoj dana 23.12.2024. godine.

Prilikom razmatranja i glasanja na održanoj sjednici po Prijedlogu rješenja nisu ispunjeni zakonski uslovi propisani članom 24. stav (2) Zakona o konkurenciji, predloženo rješenje nije dobilo potrebnu većinu, odnosno podršku članova jednog od tri konstitutivna naroda, te shodno tome isto nije usvojeno, o čemu su obaviještene stranke aktom broj: 05-26-2-028-256-II/10 dana 26.12.2024. godine.

Dana 13.01.2025. godine pod brojem: 05-26-2-258-164-II/10 privredni subjekt Crumb group dostavio je Odgovor na obavještenje Konkurencijskog vijeća broj: 05-26-2-028-256-II/10, te istim zatražio donošenje rješenja s ciljem pokretanja uspravnog spora.

Podneskom je, između ostalog, zatraženo da se u obrazloženju rješenja navede razlog izostanka primjene dosadašnjih presuda Suda BiH, kao i da sadrži pojašnjenje koji vitalni nacionalni interes bi bio povrijeđen donošenjem meritornog rješenja.

Imajući u vidu navedeno, Konkurencijsko vijeće je u skladu sa članom 11. stav (3) Zakona donijelo odluku kao u tački 1. dispozitiva ovog Rješenja.

Administrativna taksa

U skladu sa članom 2. tarifni broj 107. stav (1) tačka f) Odluke o visini administrativnih taksi u vezi sa procesnim radnjama pred Konkurencijskim vijećem («Službeni glasnik BiH», broj 30/06, 18/11 i 75/18) Podnosilac zahtjeva je na ovo Rješenje obavezan platiti administrativnu taksu u ukupnom iznosu od 1.500,00 KM u korist Budžeta institucija Bosne i Hercegovine.

Administrativna taksa u iznosu od 1.500,00 KM je u ovom postupku uplaćena dana 14.10.2011. godine na Rješenje Konkurencijskog vijeća broj: 05-26-2-258-76-II/10.

Pouka o pravnom lijeku

Protiv ovoga Rješenja nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovoga Rješenja.

Predsjednik

Ivo Jerkić